



Na osnovu člana 15. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, br. 49/06 i 51/09) i čl. 25. i 69. Statuta Općine Centar Sarajevo-Prečišćeni tekst („Službene novine Kantona Sarajevo“, broj 23/04), a u vezi sa tačkom 5. Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj 37/24) Općinski načelnik Općine Centar, donosi

## **PRAVILNIK**

### **o uslovima, kriterijima i postupku ostvarivanja prava na refundaciju troškova kupovine plastenika**

#### **I OPĆE ODREDBE**

##### **Član 1.**

(Predmet)

Ovim Pravilnikom utvrđuju se uslovi, kriteriji i postupak za ostvarivanje prava na refundaciju troškova kupovine plastenika površine 18 m<sup>2</sup>, u svrhu razvoja poljoprivredne proizvodnje i podrške samozapošljavanju na području Općine Centar Sarajevo. (u daljem tekstu: Općina)

##### **Član 2.**

(Rodno značenje izraza)

Izrazi koji se koriste u ovom Pravilniku, a koji imaju rodno značenje, bez obzira jesu li korišteni u muškom ili ženskom rodu, obuhvataju na jednak način muški i ženski rod.

##### **Član 3.**

(Značenje pojedinih izraza)

U smislu ovog Pravilnika, pojedini izrazi imaju sljedeće značenje:

- a) „Poljoprivredna djelatnost“ podrazumijeva privrednu djelatnost koja obuhvata biljnu i animalnu proizvodnju i s njima povezane uslužne djelatnosti u skladu sa standardnom klasifikacijom djelatnosti u Bosni i Hercegovini.
- b) „Kandidat“ podrazumijeva poljoprivrednog proizvođača registrovanog za obavljanje poljoprivredne proizvodnje; pravno lice (registrovano po Zakonu o privrednim društvima i Opštem zakonu o zadrugama); fizičko lice (registrovano po Zakonu o obrtu i srodnim djelatnostima) i neregistrovano fizičko lice koje se bavi poljoprivredom, a koje je upisano u Registar poljoprivrednih gazdinstava i Registar klijenata na području Općine.
- c) „Korisnik“ je kandidat koji ispunio uslove i sa kojim Općina potpiše Ugovor o refundaciji troškova kupovine plastenika.

## **II USLOVI I POTREBNA DOKUMENTACIJA ZA OSTVARIVANJE PRAVA UČEŠĆA KANDIDATA U PROJEKTU**

### **Član 4.** (Kandidati)

- (1) Pravo na refundaciju troškova kupovine plastenika površine 18 m<sup>2</sup> ostvaruju fizička lica i obrtnici (vlasnici obrta) sa prebivalištem, odnosno poslovnim sjedištem na području Općine Centar Sarajevo, upisana u Registar poljoprivrednih gazdinstava i Registar klijenata u nadležnoj službi Općine Centar Sarajevo i koja su izvršila ažuriranje podataka do 31.03.2026.godine.
- (2) Maksimalni iznos finansiranja je do 1.500,00 KM sa PDV-om po korisniku.
- (3) Isplata sredstava vrši se po modelu refundacije, na način da korisnik nakon izvršene kupovine plastenika dostavlja dokaz o namjenskom utrošku sredstava, na osnovu čega Općina vrši isplatu odobrenih sredstava.
- (4) Svaki korisnik može ostvariti pravo na jedan platenik površine 18 m<sup>2</sup>.
- (5) Isplata iz Budžeta Općine vrši se do utroška sredstava.

### **Član 5.** (Uslovi)

- (1) Pravo na refundaciju kupovine plastenika mogu ostvariti kandidati koji ispunjavaju sljedeće uslove:
  - (a) fizička lica i obrtnici (vlasnici obrta) koji ispunjavaju uslove propisane članom 4. stav (1) ovog Pravilnika;
  - (b) da je kandidat korisnik (vlasnik, posjednik ili zakupac poljoprivrednog zemljišta po osnovu ugovora o zakupu/korištenju zaključenog na period od najmanje 5 godina) minimalno 50 m<sup>2</sup> poljoprivrednog zemljišta pogodnog za plateničku proizvodnju, na teritoriji Općine Centar Sarajevo. Poljoprivredno zemljište na kojem se namjerava postaviti platenik mora zadovoljiti sljedeće karakteristike:
    1. da je pogodno za plateničku proizvodnju;
    2. da se ne nalazi u brdovitom području pod nagibom;
    3. da ima osiguran pristup izvorištu vode ili vodovodnoj mreži.
  - (c) da kandidat nije ostvario pravo na donaciju/dodjelu, finansiranje/sufinansiranje pri kupovini plastenika u posljednje 4 godine od bilo kojeg nivoa vlasti u BiH, udruženja, fondacija i drugih organizacija;
  - (d) da će kandidat kupljeni platenik zadržati u vlasništvu najmanje 3 godine od dana ostvarivanja podsticaja.

### **Član 6.** (Potrebna dokumentacija)

Kandidat koji želi ostvariti pravo na refundaciju kupovine plastenika obavezan je dostaviti sljedeću dokumentaciju kojom dokazuje ispunjavanje uslova, u originalu ili ovjerenim kopijama kako slijedi:

1. obrazac zahtjeva za refundaciju kupovine plastenika potpisan od podnosioca zahtjeva;
2. dokaz o pravu vlasništva, zakupu ili drugom zakonitom osnovu korištenja poljoprivrednog zemljišta (zemljišnoknjižni izvadak ne stariji od 6 mjeseci, ugovor o zakupu/korištenju zemljišta sa ili bez naknade zaključen na period od najmanje 5 godina sa zemljišnoknjižnim izvatkom);
3. rješenje nadležnog organa kojim se odobrava obavljanje poljoprivredne djelatnosti, koje nadležna Služba pribavlja po službenoj dužnosti (za obrte);
4. ovjerena izjava podnosioca zahtjeva da u posljednje 4 godine od raspisivanja javnog poziva, nije ostvario pravo na donaciju, finansiranje/sufinansiranje pri kupovini plastenika od bilo kojeg nivoa vlasti u BiH, udruženja, fondacija i drugih organizacija;
5. ovjerena izjava podnosioca zahtjeva da će kupljeni plastenik zadržati u vlasništvu najmanje 3 godine od dana potpisivanja Ugovora;
6. faktura i fiskalni račun dobavljača plastenika sa pratećom opremom izdati u periodu od 01.01.2026. godine do dana zatvaranja javnog poziva, sa jasno naznačenom površinom plastenika, specifikacijom opreme, ukupnom cijenom;
7. dokaz o aktivnom i otvorenom računu u banci (za tekuću godinu).
8. Podnosioci zahtjeva koji imaju registrovanu poljoprivrednu djelatnost, dužni su dostaviti Uvjerenje o izmirenim poreskim obavezama za tekuću godinu.

### **III FINANSIRANJE PROJEKTA**

#### **Član 7.**

(Nosilac aktivnosti)

- (1) Služba za privredu i poslovne prostore je nosilac aktivnosti vezanih za realizaciju Projekta.
- (2) Sredstva za realizaciju Projekta planirana su u Budžetu Općine Centar Sarajevo na ekonomskom kodu 615200 kao podrška poljoprivrednim proizvođačima za proljetnu i jesenju sjetvu, voćarske sadnice i plastenike.

### **IV IZBOR KANDIDATA**

#### **Član 8.**

(Javni poziv)

- (1) Sredstva se dodjeljuju na osnovu raspisanog javnog poziva i podnesenih zahtjeva po istom.
- (2) Općinski načelnik će objaviti Javni poziv za realizaciju sredstava projekta refundacije troškova kupovine plastenika na području Općine Centar Sarajevo.
- (3) Javni poziv sadrži: uslove koje kandidat mora ispunjavati, rok za podnošenje prijave i druge potrebne podatke.
- (4) Javni poziv ostaje otvoren 15 (petnaest) dana od dana objavljivanja Javnog poziva u dnevnom listu, web stranici, oglasnoj ploči Općine Centar Sarajevo.
- (5) Odluka o rezultatima Javnog poziva će biti objavljena na web stranici i oglasnoj ploči Općine Centar Sarajevo.

#### **Član 9.**

(Odabir kandidata)

- (1) Komisiju za odabir korisnika sredstava Projekta imenuje Općinski načelnik.
- (2) Komisija se sastoji od najmanje tri člana iz reda državnih službenika.
- (3) Komisija radi u punom sastavu i za svoj rad je odgovorna Općinskom načelniku.
- (4) Komisija ima zadatak da u skladu sa odredbama ovog Pravilnika i na osnovu utvrđenih kriterija objavljenih u Javnom pozivu, izvrši evaluaciju pristiglih prijava, evidentira kandidate koji ispunjavaju uslove iz javnog poziva, izvrši procjenu karakteristika poljoprivrednog zemljišta i bodovanje istih, utvrdi prijedlog rang liste na osnovu propisanih kriterija za bodovanje, te sačini pismeni izvještaj sa utvrđenim prijedlogom rang liste i dostavi je Općinskom načelniku.
- (5) Neblagovremene prijave Komisija neće uzeti u razmatranje o čemu će podnosilac prijave biti obaviješten.
- (6) Komisija ima mogućnost da u skladu sa tačkom 47. Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj 37/24) kandidatu koji je dostavio nepotpunu prijavu dostavi obavijest o dopuni iste u roku od 3 dana od dana prijema obavijesti, ukoliko je kandidat u momentu podnošenja prijave učinio izvjesnim razloge zbog kojih nije mogao podnijeti potpunu prijavu ili ako je u prijavi uočena manja tehnička manjkavost.
- (7) Komisija vrši rangiranje kandidata koji zadovoljavaju formalne uslove Javnog poziva na osnovu izvršene procjene karakteristika poljoprivrednog zemljišta na terenu i bodovanja istog po sljedećim kriterijima:
  - a. platenik postavljen na zemljištu koje je pogodno za plateničku proizvodnju, sa odgovarajućim nagibom, ekspozicijom i konfiguracijom terena. .... 20 bodova
  - b. udaljenost objekata koji bi mogli stvarati sjenu na plateniku ..... 20 bodova
  - c. udaljenost od industrijskih zagađivača minimum 0,5 km, a od glavnih saobraćajnica 50 m ..... 20 bodova
  - d. pristup izvoru vode ili vodovodnoj mreži ..... 20 bodova
  - e. pristupna infrastruktura i tehnički uslovi (pristupni put do parcele, mogućnost priključka na električnu energiju) ..... 10 bodova
  - f. podnosilac zahtjeva nije imao plateničku proizvodnju ..... 10 bodova
- (8) U slučaju da dva ili više kandidata ostvare isti broj bodova, prednost će imati kandidat koji do trenutka podnošenja zahtjeva nije imao plateničku proizvodnju. Ukoliko kandidati i po navedenom kriteriju ostvare isti broj bodova, prednost će imati kandidat čija je prijava ranije zaprimljena.
- (9) Komisija zadržava pravo da izvrši uviđaj na terenu u cilju utvrđivanja vjerodostojnosti priložene dokumentacije iz svakog pojedinačnog zahtjeva.
- (10) Na osnovu prijedloga Komisije, Općinski načelnik objavljuje preliminarnu listu odabranih korisnika sredstava na web stranici i oglasnoj ploči Općine Centar Sarajevo.
- (11) Podnosioci zahtjeva mogu u roku od osam (8) dana, od dana objavljivanja preliminarne liste podnijeti pismeni prigovor Komisiji za razmatranje prigovora koju imenuje Općinski načelnik iz reda državnih službenika.
- (12) Odluku o prigovoru, Komisija će donijeti u roku od osam (8) dana računajući od dana podnošenja prigovora.
- (13) Nakon okončanog postupka po prigovorima, Općinski načelnik donosi konačnu Odluku o refundaciji troškova kupovine platenika izabranih kandidata, koja će biti objavljena na web stranici i oglasnoj ploči Općine Centar Sarajevo.
- (14) Dodjela sredstava vršit će se u skladu sa raspoloživim sredstvima, a najviše do iznosa planiranog Budžetom Općine Centar.

## **Član 10.**

(Prava i obaveze)

- (1) Izabrani kandidati potpisuju Ugovor o dodjeli sredstava za kupovinu plastenika sa Općinom Centar Sarajevo, kojim se regulišu međusobna prava i obaveze.
- (2) Dodijeljena sredstva se odnose isključivo na plastenik, njegovu montažu, sistem za navodnjavanje i bure. Svi eventualni dodatni troškovi, kao i nabavka dodatne opreme (grijači, ventilatori, sadnice i sl.) snosi izabrani kandidat.
- (3) Korisnik je obavezan izvršiti kupovinu plastenika kod registrovanog dobavljača o vlastitom trošku.
- (4) Nakon izvršene kupovine plastenika, korisnik podnosi Općini zahtjev za refundaciju sredstava uz dostavljanje kompletne dokumentacije iz člana 6. ovog Pravilnika.
- (5) Općina će, nakon administrativne i terenske provjere, izvršiti isplatu odobrenih sredstava na račun korisnika.
- (6) Općina zadržava pravo da ne prizna troškove koji značajno odstupaju od prosječnih tržišnih cijena plastenika.
- (7) Općina zadržava pravo da izvrši terensku kontrolu prije i nakon isplate sredstava.
- (8) Ukoliko se utvrdi da sredstva nisu utrošena u skladu sa odredbama ovog Pravilnika ili da su dostavljeni netačni podaci, Općina će pokrenuti postupak povrata sredstava u skladu sa zakonskim propisima.

## **V MONITORING**

### **Član 11.**

(Monitoring i kontrola)

- (1) Nakon provedene procedure i donošenja Odluke o dodjeli novčanih podsticaja, Služba će kontinuirano pratiti i provjeravati realizaciju Ugovora u periodu od 1 (jedne) godine od dana zaključivanja Ugovora sa izabranim kandidatima, uz zadržavanje prava kontrole tokom cijelog perioda obaveze zadržavanja plastenika iz člana 6. tačka 6. ovog Pravilnika.
- (2) Ukoliko se utvrdi da su dodijeljena sredstva utrošena nenamjenski ili ostvorena na osnovu lažno prikazane proizvodnje ili lažne dokumentacije ili korisnik podsticaja postupi suprotno datoj izjavi, Općina Centar Sarajevo će pokrenuti postupak za povrat sredstava.
- (3) U slučaju iz stava (2) ovog člana, kandidat može podnijeti novi zahtjev za ostvarivanje prava na novčani podsticaj i ostvariti pravo na novčani podsticaj ukoliko je ispunio sve uslove propisane ovim Pravilnikom, nakon tri godine od dana povrata novčanih sredstava.

## **VI PRELAZNE I ZAVRŠNE ODREDBE**

### **Član 12.**

(Prestanak važenja)

Danom stupanja na snagu ovog Pravilnika prestaje važiti Pravilnik o uslovima, kriterijima i postupku za ostvarivanje prava na sufinansiranje i finansiranje kupovine plastenika na

području Općine Centar Sarajevo za 2026. godinu, broj: 16-11-1941/26 od 11.03.2026. godine.

**Član 13.**  
(Stupanje na snagu)

Ovaj Pravilnik stupa na snagu narednog dana od dana objavljivanja na oglasnoj ploči i web stranici Općine Centar Sarajevo.

Broj:16-11-3648/26

Sarajevo, 03.06.2026. godine

**OPĆINSKI NAČELNIK**

\_\_\_\_\_  
**Srđan Mandić**